

Modificación do Regulamento de Estudos de Doutoramento da Universidade de Santiago de Compostela

Exposición de motivos

O Regulamento de Estudos de Doutoramento, aprobado no Consello de Goberno do 25 de xuño de 2012 (DOG nº 164 do 29 de agosto de 2012), no relativo ao tribunal da defensa da tese, continuou co que xa establecía o anterior Regulamento de Estudos de Terceiro Ciclo, configurándose cunha composición de sete membros, cinco deles titulares e dous deles suplentes.

Nestes últimos anos, téñense promovidos na maioría das universidades españolas, incluídas as outras dúas universidades do SUG, unha redución na composición do número de membros titulares nun tribunal de tese a tres, que procura unha mellora na xestión administrativa, unha simplificación burocrática e unha menor carga orzamentaria. A este respecto, cabe lembrar, que unha tese é autorizada para a súa defensa, unha vez revisada pola Comisión Académica do Programa de Doutoramento e pola Comisión da Escola de Doutoramento sometida a exposición pública para que calquera doutor poda examinar a tese, e emitidos varios informes, incluídos os dos membros do tribunal, polo que a redución do número de membros do tribunal non significa unha merma dos controis de calidade da tese.

Por todo o anterior o Consello de Goberno na súa sesión do 10 de marzo de 2016 acordou modificar o Regulamento de Estudos de Doutoramento aprobado no Consello de Goberno do 25 de xuño de 2012 (DOG nº 164 do 29 de agosto de 2012), do seguinte modo:

1.- Acordase modificar os artigos 34, 36 e 37 que pasan a ter o seguinte tenor literal:

Artigo 34. Procedemento de autorización da defensa da tese

Xa rematada a elaboración da tese e logo do informe favorable do director ou directores e, de ser o caso, do titor, a persoa doutoranda solicitará á CAPD a autorización para a súa defensa de acordo co procedemento establecido para o efecto.

Cando a CAPD autorice a presentación da tese para a súa defensa, remitiralle coa maior brevidade á ED responsable do programa de doutoramento a seguinte documentación:

- O informe de autorización para a defensa da tese emitido pola CAPD.
- Un exemplar da tese en soporte papel asinado polo doutorando, polo director ou directores da tese e, de ser o caso, polo titor, así como un exemplar en formato electrónico (PDF).
- Toda a documentación requirida no caso de que se solicite a mención internacional e/ou a tese por compendio de publicacións segundo o establecido no presente regulamento.
- O documento de actividades do doutorando actualizado e o plan de investigación acompañado dos informes favorables do titor e do director.
- Unha proposta dos posibles membros para participaren no tribunal que xulgará a tese aprobada pola CAPD, formado por doutores especialistas na materia da tese de

doutoramento, con experiencia investigadora acreditada e segundo o establecido no artigo 36 do presente regulamento.

Unha vez recibida toda a documentación da tese e revisado pola ED responsable do programa de doutoramento que o expediente está completo e correcto, abrírase un período de exposición pública de dez días hábiles en período lectivo, garantindo a máxima difusión institucional para que calquera doutor poida examinar a tese e dirixirle por escrito as consideracións que considere oportunas á ED da USC. Co fin de facilitar a consulta das teses, a Universidade poderá habilitar un procedemento telemático, sempre que non concorran limitacións derivadas do artigo 14.6 do RD 99/2011.

Finalizado o período de exposición pública, a ED valorará a tese tendo en conta o informe da CAPD e as alegacións recibidas, de ser o caso. Ademais, a ED poderá convocar o doutorando e/ou director, solicitarlle unha resposta razoada ás alegacións ou outra información que considere necesaria, ou consultar a CAPD e contar coa colaboración doutros doutores externos para asesoramento na avaliación da tese.

Tras valorar a tese, a ED decidirá aprobar ou denegar a continuidade dos trámites, o que rexistrará no documento de actividades do doutorando e, ademais, lles comunicará ao director ou directores da tese de doutoramento, ao doutorando e á CAPD.

No caso de denegación da continuidade dos trámites, que deberá estar debidamente motivada, a ED comunicarlle ao doutorando cómo corrixir axeitadamente a súa tese de doutoramento antes de proceder a unha nova solicitude de depósito.

No caso de aprobación de continuidade, procederase á aprobación do tribunal nos termos establecidos no artigo 36 do presente regulamento.

Nomeado o tribunal e suplentes, comunicarase o nomeamento á CAPD, e farase chegar a cada un deles a notificación da súa designación como membro do tribunal, un exemplar da tese de doutoramento e o expediente administrativo do doutorando. A partir deste momento, os titulares e suplentes do tribunal disporán de vinte días naturais para lle enviar á Comisión de Doutoramento un informe individual e razoado en que se valore a tese e no cal figure explicitamente o ditame sobre se procede ou non autorizar a defensa da tese. Ademais, a ED remitirá toda a documentación referida da tese á Comisión de Doutoramento.

Unha vez recibidos os informes, a Comisión de Doutoramento disporá se procede ou non a defensa pública ou, de ser o caso, a interrupción da súa tramitación, o que se comunicará por escrito ao doutorando, aos directores da tese, á CAPD e á ED.

Se a Comisión de Doutoramento lle negar a defensa da tese de doutoramento, o doutorando poderá solicitar a certificación literal dos ditames a que se refire este artigo. Se lle for autorizada a defensa, poderá solicitala despois da súa defensa.

A defensa pública deberá realizarse nun prazo máximo de tres meses desde a súa autorización, agás causas debidamente xustificadas e previa autorización da Escola de Doutoramento. De superarse este prazo, deberán iniciarse de novo os trámites de autorización da tese para súa defensa.

Ao longo do proceso de autorización da defensa da tese o doutorando estará obrigado a introducir os datos da súa tese na base Teseo segundo o procedemento e prazos que establece a Universidade.

Artigo 36. *Tribunal de avaliación*

A CAPD, oído o/a director/a da tese (e/ou de ser o caso, o/a titor/a), propondrá unha relación de seis membros do tribunal que avaliará a tese.

Admitida a trámite a tese de doutoramento pola CAPD, a ED responsable do programa de doutoramento avaliará a proposta de tribunal remitida pola CAPD, que irá acompañada dun informe individualizado e razoado sobre a idoneidade de cada un dos membros propostos para xulgar a tese, dos cales se mencionará a especialidade ou especialidades da súa investigación, publicacións, proxectos de investigación e outras actividades ou méritos que consideren oportunos, así como a súa aceptación expresa destes membros.

A ED designará o tribunal encargado de xulgar a tese entre os seis especialistas propostos pola CAPD, que estará constituído por tres titulares e dous suplentes. No caso de teses en cotutela reguladas polo correspondente convenio, o número de membros titulares do tribunal poderá ser superior a tres e a composición do tribunal virá dada polo establecido no convenio,

Entre os membros do tribunal nomearanse dous para os cargos de presidencia e secretaría do tribunal.

O/a secretario/a designarase preferentemente entre os membros do tribunal que pertencen á USC; de non ser así, deberá presentarse un informe xustificativo e sinalar outro membro do profesorado da universidade como responsable de recibir as actas e entregalas posteriormente na unidade administrativa correspondente.

En caso de renuncia por causa xustificada dun integrante titular do tribunal procederase a substituílo por un suplente.

Na composición do tribunal deben respectarse os seguintes requisitos:

- a) Todos os membros deberán ser persoal doutor e con experiencia investigadora acreditada. Entenderase por experiencia acreditada o cumprimento dalgún dos requisitos establecidos para ser director de tese no presente regulamento. O profesorado universitario poderá formar parte dos tribunais de teses de doutoramento aínda que estean en situación de excedencia, xubilación, servizos especiais ou en comisión de servizos; neste último caso considerarase que pertence á universidade en que se atope prestando os seus servizos.
- b) O tribunal estará formado por unha maioría de membros externos á universidade e ás institucións colaboradoras no programa de doutoramento. Non podendo formar parte do tribunal que actúe máis dun membro dunha mesma institución.
- c) No caso de teses presentadas por compendio de publicacións non poderán formar parte do tribunal os coautores das publicacións.
- d) En ningún caso poderán formar parte do tribunal o/a director/a ou codirectores/as da tese nin, de ser o caso, o/a titor/a, salvo nos casos de teses presentadas no marco de acordos bilaterais de cotutela con universidades estranxeiras que así o teñan establecido, ou nos casos de teses presentadas en programas de doutoramento conxuntos con universidades estranxeiras, en virtude dos correspondentes convenios.
- e) No caso da mención internacional no título de doutor ou doutora, ten que formar parte do tribunal titular cando menos un experto co título de doutor dunha institución de ensino superior ou centro de investigación de prestixio non españois, e distinto do responsable da estancia sinalada no artigo 40. Para iso nomearase un doutor estranxeiro na comisión titular e outro que cumpra as mesmas condicións como suplente.
- f) A composición do tribunal procurará unha presenza equilibrada de homes e mulleres, agás causas xustificadas.
- g) Non poderán formar parte da proposta dun tribunal as persoas que incorran en calquera das causas de abstención establecidas no artigo 28 da Lei 30/1992, do 26 de novembro.

Artigo 37. *Acto de defensa pública da tese*

Unha vez autorizada a defensa pública da tese, o/a doutorando/a deberá efectuar o pagamento das taxas dos dereitos de exame do grao de doutor correspondente na Sección de Posgrao, Terceiro Ciclo e Formación Continua do Servizo de Xestión Académica ou na unidade administrativa que se determine.

Unha vez realizado o dito pagamento, o Centro de Posgrao remitiralle ao/á secretario/a do tribunal os documentos que se deben cubrir no acto de defensa da tese de doutoramento:

- Acta de constitución do tribunal.
- Acta da sesión.
- Sobres oficiais para recoller os informes confidenciais sobre a tese para os efectos da mención de cum laude e premio extraordinario.

O presidente do tribunal convocará o acto de defensa da tese de doutoramento e o secretario comunicará, polo menos con dez días de antelación, o día, o lugar e a hora do citado acto á ED, que á súa vez informará a CAPD, o doutorando ou doutoranda e o director da tese, e fará a publicidade pertinente.

A defensa da tese deberase realizar nunha sesión pública durante o período lectivo do calendario académico e terá lugar na propia universidade española en que o doutorando ou doutoranda estivese matriculada ou, no caso de programas de doutoramento conxuntos, nos termos que indiquen os convenios de colaboración. Calquera outra opción requirirá a autorización expresa da Comisión de Doutoramento, que deberá asegurar, en todo momento, o cumprimento desta normativa e dos procesos establecidos para a súa avaliación.

A ED poderá autorizar que participe un membro do tribunal por videoconferencia en casos debidamente xustificadas por circunstancias excepcionais que imposibiliten a súa presenza física, a condición de que os outros membros do tribunal estean presentes no acto.

Este membro ausente non poderá ser en ningún caso o presidente ou o secretario do tribunal.

Se no acto de defensa e exposición pública da tese non se presenta algún membro do tribunal titular, incorporárase o suplente correspondente. . De non poder constituírse o tribunal, o presidente comunicará este feito á ED responsable do programa de doutoramento, que poderá autorizar a defensa nas 48 horas seguintes. De non ser factible, o presidente convocará de novo o acto de defensa da tese de doutoramento nos mesmos termos do parágrafo 3 deste punto.

Os membros do tribunal deberán expresar a súa opinión sobre a tese e poderán formular cantas cuestións e obxeccións consideren oportunas, ás cales o/a doutorando/a deberá responder. Así mesmo, os doutores presentes no acto poderán formular cuestións e obxeccións, e o/a doutorando/a responder, todo isto no momento e forma que sinale o/a presidente/a do tribunal.

2.- Entrada en vigor :

A presente modificación entrará en vigor ao día seguinte da súa publicación no Taboleiro electrónico oficial da USC

Ás teses depositadas a partir da citada publicación lle será de aplicación o recollido na presente modificación.